

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine FBiH”, broj: 49/06 i 51/09), člana 17. stav (2) Zakona o pečatu USK ("Službeni list USK", br. 1/95 i 3/97 i "Službeni glasnik USK" br. 18/04), i člana 124. Statuta Općine Velika Kladuša a („Službeni glasnik Općine Velika Kladuša“, broj: 12/11) Općinsko vijeće Općine Velika Kladuša na _____ redovnoj sjednici održanoj dana _____ godine, donijelo je:

**ODLUKU
O IZRADI, UPOTREBI, ČUVANJU I UNIŠTAVANJU PEČATA
OPĆINSKOG VIJEĆA OPĆINE VELIKA KLADUŠA**

I - UVOD

Član 1.

Ovom Odlukom se uređuje način izrade, upotrebe, čuvanja i uništavanja pečata Općinskog vijeća Općine Velika Kladuša (u daljem tekstu: pečat) koji se koristi u vršenju poslova iz nadležnosti Općinskog vijeća, u skladu sa zakonom.

Član 2.

Pečatom se potvrđuje autentičnost isprave ili drugog akta Općinskog vijeća kojim se odlučuje ili službeno kontaktira sa strankama, drugim organima, pravnim licima i građanima.

II – OBLIK I SADRŽAJ PEČATA

Član 3.

(1) Pečat Općinskog vijeća ima oblik kruga prečnika 50mm i sadrži tekst: u prvom koncentričnom krugu ispisan sitnim slovima Bosna i Hercegovina, Federacija Bosne i Hercegovine, na latiničnom i ćiriličnom pismu, u drugom koncentričnom krugu većim slovima UNSKO-SANSKI KANTON, na latiničnom i ćiriličnom pismu, u trećem krugu velikim slovima OPĆINA VELIKA KLADUŠA, na latiničnom i ćiriličnom pismu, u petom krugu naziv organa Općinsko vijeće ispisan velikim slovima latiničnog i ćiriličnog pisma te u šestom krugu velikim slovima je ispisan sjedište organa VELIKA KLADUŠA na latiničnom i ćiriličnom pismu U sredini pečata se nalazi grb Unsko-sanskog kantona te broj pečata.

(2) Općinsko vijeće Općine Velika Kladuša može imati pečat manjeg prečnika (u daljem tekstu: mali pečat) za potvrđivanje službenih legitimacija, finansijskih i drugih dokumenata. Mali pečat ima isti sadržaj kao i pečat iz člana 3. ove Odluke tako da se tekst na pečatu može sažeti, skraćivanjem pojedinih riječi, ali tako da se jasno vidi sadržaj pečata. Mali pečat ne može biti manji od 20mm u prečniku.

(3) Svaki primjerak pečata označen je brojem.

III – IZRADA PEČATA

Član 4.

Pored pečata iz člana 3. ove Odluke Općinsko vijeće može za svoje potrebe i obavljanje poslova iz svog djelokruga izraditi i druge pečate istog ili drugog sadržaja u skladu sa zakonom o pečatima ako se ukaže potreba za tim i uslijed povećanja obima poslova.

Član 6.

O potrebi izrade pečata, njihovoj upotrebi kao i drugim pitanjima vezanim za pečate koji se koriste u Općinskom vijeću odlučuje predsjedavajući Općinskog vijeća.

Član 7.

Izrada pečata vrši se po postupku i na način propisan odredbama Zakona o pečatima („Službene novine Federacije BiH“ broj 7/96) i odredbama Zakona o pečatu Unsko-sanskog kantona ("Službeni list USK", br. 1/95 i 3/97 i "Službeni glasnik USK" br. 18/04)

IV - UPOTREBA, ČUVANJE I EVIDENCIJA PEČATA

Član 8.

Pečat se utiskuje sa lijeve strane potpisa lica ovlaštenog za potpisivanje službenog akta, ako zakonom ili drugim propisom nije drugačije određeno.

Član 9.

Pečatom rukuje, upotrebljava ga i stara se o njegovom čuvanju u skladu sa zakonom i ovom Odlukom predsjedavajući Općinskog vijeća i službena osoba (službenik ili namještenik) po ovlaštenju predsjedavajućeg Općinskog vijeća.

Član 10

- (1) Pečat se čuva i upotrebljava u prostorijama Kabineta predsjedavajućeg Općinskog vijeća.
- (2) Izuzetno, pečat se može upotrebljavati izvan prostorija Općine Velika Kladuša.
- (3) U slučaju iz stava 2. ovog člana, potrebna je saglasnost predsjedavajućeg Općinskog vijeća odnosno službene osobe koju je predsjedavajući Općinskog vijeća ovlastio da rukuje, upotrebljava ga i stara se o njegovom čuvanju.
- (4) Pečati se moraju čuvati na zaključanom mjestu te čuvati i upotrebljavati tako da se onemogućí njihova zloupotreba od strane neovlaštenih lica.

Član 11.

Evidenciju zaduženja sa pečatima u upotrebi i evidenciju svih izrađenih, uništenih ili nestalih pečata vodi službena osoba koju je ovlastio predsjedavajući Općinskog vijeća.

V - UNIŠTAVANJE PEČATA

Član 12.

- (1) Pečat koji je zbog istrošenosti ili iz drugih razloga postao neupotrebljiv se uništava o čemu odlučuje predsjedavajući Općinskog vijeća.
- (2) Službenik ili namještenik ovlašten za rukovanje i upotrebu pečata dužan je pismeno obavijestiti predsjedavajućeg Općinskog vijeća o neupotrebljivosti pečata kada se zbog istrošenosti ili oštećenja iz njegovog otiska jasno ne vidi tekst koji daje otisak.
- (3) Predsjedavajući Općinskog vijeća imenuje komisiju od tri člana iz reda uposlenika Stručne službe Općinskog vijeća ili općinskih vijećnika koja će uz sačinjavanje zapisnika izvršiti uništavanje neupotrebljivih pečata i pečata koji se ne koriste. Zapisnik obavezno sadrži otisak pečata koji se uništava.

Član 13.

- (1) Predsjedavajući Općinskog vijeća ili službena osoba ovlaštena za čuvanje i upotrebu pečata dužni su odmah po saznanju prijaviti nestanak pečata Ministarstvu unutrašnjih poslova, te isto objaviti u "Službenom glasniku Općine Velika Kladuša" i "Službenom glasniku USK".
- (2) Nestali pečat se smatra nevažećim od dana nestanka odnosno oglašavanja u "Službenom glasniku USK", a u slučaju kasnijeg pronalaženja nevažeći pečat će se uništiti na način propisan Zakonom o pečatima USK i ovom Odlukom.

Član 14.

Stupanjem na snagu ove Odluke stavlja se van snage svi prethodno doneseni akti o izradi, upotrebi, čuvanju i uništavanju pečata Općine Velika Kladuša koji nisu u skladu sa ovom Odlukom.

Član 15.

Ova Odluka stupa na snagu danom donošenja, a objavit će se u „Službenom glasniku Općine Velika Kladuša.

PREDLAGAČ.
Kolegij Općinskog vijeća
Općine Velika Kladuša

OBRAZLOŽENJE:

I – PRAVNI OSNOV

Pravni osnov za donošenje ove odluke leži u osnovu član 13. Zakona o principima lokalne samouprave u Federaciji Bosne i Hercegovine („Službene novine FBiH”, broj: 49/06 i 51/09), kojim se određuju nadležnosti Općinskog vijeća, članu 17 stav 2 Zakona o pečatu USK ("Službeni list USK", br. 1/95 i 3/97 te "Službeni glasnik USK" br. 18/04) kojim se propisuje da o načinju čuvanja i upotrebe pečata odlučuje rukovodilac organa , te člana 124. Statuta Općine Velika Kladuša a („Sl. glasnik Općine Velika Kladuša“, broj: 12/11) koji propisuje da „Općinsko vijeće donosi: statut, budžet, završni račun, odluke, pravila, pravilnike i poslovnik Općinskog vijeća“

II – RAZLOZI DONOŠENJA

Razlozi donošenja ove odluke leže u jasnom definisanju načina čuvanja i upotrebe pečata Općinskog vijeća kao posebni organ jedinice lokalne samouprave, a u okviru svojih nadležnosti, kao takva mogla nesmetano i samostalno obavljati svoje zakonom određene poslove.